

Gedichten over oude Diepenveners (13-11-2003)

bij: 'Oude Diepenveners doen opnieuw een boekje open.'

Op de historische avond op 13 november 2003 presenteerde de Historische Vereniging Dorp Diepenveen en Omgeving haar tweede interviewboek. Voor dit boek tekende de interviewgroep de levensverhalen op van 38 bewoners uit Diepenveen en omgeving en verzamelde de foto-archiefgroep bijzondere foto's. Fotograaf Harry Mulder zorgde voor een prachtig portret van elke geïnterviewde. Hanneke Denekamp en Pier Karenbeld van de interviewgroep maakten voor elke 'oude Diepenveener' een rijm in dialect die tijdens deze bijzondere avond werd voorgedragen.

Annie Regterschot - Beunk en Toos Jansen - Beunk

*Ja Auping was ok Diepenveen, det was ik haoste kwiet.
Zien bedden en matrassen, zie kent ze wied en zied
Va Beunk beheerden 't magazien was daorbie ok portier
Hee had twee dochters, Annie en Toos, die bint vanaovond hier
De Buurtschap heetten toen de Tol met allerhande nering
Met grutter Kersten, greunteboer van Tol en Vrouw Vullekes met hering
Maar ok met een huusholding van Jan Steen det was bie Rooie Hein
De kippen liepen daor in huus, foi foi wat een festijn
Maar Toos en Annie werden groot en gingen later trouwen
Met Puck en Max, ja lèès 't zelf det zal oe niet berouwen.*

Minie Hofstede - Steerneman

*De poaters van 't Sion zweeg'n as 't graf
Heur va stuur'n haar van de kloosterlanden af
Later hoev'n Minie Steerneman zich neet meer te verveel'n
Kon ze op de Kranenkampse karmse heur plezier met ander'n deel'n
In de oorlog viel 'n vliegtuug in stuk'n uut mekoar.
D'r waar'n ok schooiers, zo as de Düvel en Anne met 't lange hoar.
Minie trouwde met Hofstede en bleef bie 't klooster woon'n
Ma veur gasten van 't klooster hoev'n ze de bedd'n neet meer te verschoon'n.*

Jo Daggert - Hoeveman

*Wie gaot weer verder, gaot vedan
En zeet Jo Daggert- Hoeveman
Geboren op de Stobbenweerd, bie de klei en 't tichelwerk
Haar vader was daor steenbaas; was klein maar toch ok sterk
De veurraad klei was uut-eput toen konne daor gaon boeren
Maar de Iessel lag nog wel eens dwars, die spookten flink bie toeren
Jo mos 't huus dan altied uut, det stond dan half in 't water.
Va nam moe dan op de rugge maar det heurden ze pas later
En hoe 't verder ging, Herman Daggert kwam, ach lees het zelf jandorie.
Ook daor ligt weer een heel mooi stuk van Diepenveens historie.*

Gerrit de Beuze en Gerritje de Beuze - Grootentraast

*De Roalterweg was lang geled'n een rustige smalle stroate,
Doar ko'j rustig - midden op - een tied met elkare stoan praoten.
Meester Kolff liet er een prachtig Jachthuus bouw'n.
En in den oorlog kon de Pruus neet op de mensheid doar vertrouw'n.
Zo woll'n ze neet oaver een paadje dat netjes was an'eharkt.
Hun wantrouw'n dat al groot was, werd daordeur nog 's verstarkt.
Derk oom werd dodelijk 'etroffen deur een vall'nde vliegmachien.
Dat 't echt onze Derk oom was, kond'n ze an zien blaue Strümpfe zien.
Een van de spannend verhal'n uut een tied zo zonder hoast.
Verteld deur Gait de Beuze en zien zuster Grootentraast.*

Bertha Bos - Hiddink

*Bertha Hiddink had een mooie jeugd en spölden ongestoord
Bie wagenmaker Piepenbroek, de cocosfabriek van Hubers, kortum: op Rande Noord
Op schole kletsten ze te völle, straf kwam van alle kanten
Intussen leerden ze wel zwemmen van dikke Marie van Zanten
In de oorlog was ze ooggetuuge van een oaverval
Toen het verzet van Diepenveen de distributiebonnen stal.
Gelukkig, niemand werd d'r op-epakt, nee niemand werd de klos
Met Bertha liep het verder ok goed af, want zie vond Marten Bos
Naor Colmschaote gingen zie en deden nog in textiel
Heur lopen geet niet meer zo best, maar met een scooter toch mobiel*

Pater Desiderius Geijsen

*As kwoajonge op'egreuid in de katelieke Boskamp
war'n die uut 't protestantse Olst veur hun een ramp.
"Papen stoa neet te gapen", riep'n ze en schoaten met stenen
In de buurte van hun karke namen ze ok rap de benen.
Later as poater in 't Sion hatte last van een kies.
De tandarts trok 'm. 't Deed piene, au, au, au, au ! Onwies !
Hee wis neet van ellende woarte zien vree mos' zeuken,
En as monnik mogge netuurlik helemoale neet vleuken.
Nooit zalle ok de wereldse reis noar Lourdes ooit vergèèt'n.
Pater Desiderius is rieke, meer an verhaal'n as an watte hef bezéét'n*

Rinus ten Kleij en Dini ten Kleij - Zweers

*Wat hadden wie toch een winkelstand hier in vergangen dagen
Völ slaggers bakkers kruudeniers, zie zörgden veur onze magen
Nem noe de kruudenierszaak van ten Kley, ok wied en zied bekend.
De klant was altied koning, de klant werd daar verwend.
De puntzak telden eerst nog mee, pas later kwam de brie.
Rinus greuiden in de winkel op en Dini kwam d'r bie
Die mos as kind naor Wijk aan Zee, dokter Muis wol det persè
Völ heimwee, ja det had ze wel, maar d'r was ok strand en zee.
Een middenstands bedrijf det was d'r ene van sam-sam
Ja lèès hoe een veurmalig kruudenier de vroggere tied deurkwam.*

Hein Haarman

Zien familie ging noa skole en karke in Schalkhaar.

Op de carption met de klumpkes an zat'n ze noast mekaar.

De knecht'n vroeg'n de meid'n op de jaarlikse Jennekesmarkt.

Hee hef in zien landbouwopleiding nog bie d'olde Kleverkamp 'ewarkt

De Haarmans hadd'n 'n bolle, dat was makkelijk geld,

de kinder van de keuters kwaam'n met de koe deur 't veld.

Mina, zien vrouwe verkoch'in 't bakhuus produkt'n van 't land.

Hein warkt'n jong eerst as een peerd, later met meer verstand.

't Recept um old te word'n datte een ieder gaf,

is: "Lachen is gezond en ik wach'en 't rustig af."

Henk ten Den

Henk ten den die kwam uut Heeten was an 't werk in Diepenveen

Vond daar Marie van Sterken Peeters want die hatte daar ezeen

Was annemmer in de crisistied, nam an watte maar kon

de werkplaatse had-e bie zien zwaoger, heel dichte bie 't station

De oorlogstied ging eerst nog wel maar werk kwam d'r steeds minder

Hee prakkezeerden d'r wat af, veur vrouwe knecht en kinder

Hee maakten holten spölgoed maar det werd in beslag enommen

En toen de zakkammen van holt, daar bint ze op af-ekommen.

Nao de oorlog kreeg-e völle werk en flink wat huuzen bouw

Intussen det begriep ie'j, isse al lang niet meer in touw.

Cor Hengeveld

Manch' knolle in zien kous'n kwam van 'n domme val.

Dat was heel neet slim heur, opoe of mo' stopt'n die wal.

Bie Grievink trapt'n zien peerd de smid lillik in de rugge.

Dee was zo gloepens kwoad, hee trapt'n 'm terugge.

Ok wonne bie 't ringstèèk'n met snotlap'n as pries'n

Op 't land warkt'n mechiens, veur 't eerst op hun eigen wies'n.

Hun postbode kreeg koffie; hee bracht ok nieuws in 't rond.

Dee bane was neet ongevoarlijk deur zo'n krenge van 'n herdershond.

Hun boerderieje de Leerenlampe mos wieken veur de stad.

Ma'Cor Hengeveld en zien Dina heb't in Diepenveen goed ehad.

Diny Heijser - Grievink en Gerrit Grievink

Een smederieje in vrogger tied, det was een fenomeen

't gehamer op 't aambeeld heurden ie ok in Diepenveen

Ie'j hadden toen de kachelsmid, maar ook een smid veur peerden

Biej Grievink stonden d'r heel wat die hem af en toe ook smeerden

Een hoefiezer brengt wel geluk, maar 't maken was een klus

Zie bôgen 't iezer met de hand, noe eens weer zo dan zus

Ook kwammen ze bie klanten thuus en maakten heel wat mee

Bie Rooie Hendrik van de Tol zelfs een bedde vol met vee.

*Töt an de jaoren tachtig bleef de smidse nog bestaon
D'r kwam zelfs nog een winkel bie, maar die is ok weg-egaon*

Gerrit Nieuwenhuis

*In de oorlog stond van boerderie Ten Voorde plotsklaps neet meer völle.
Ma deur een engel werd'n ze allen 'ered uut die heite en vurige hölle.
Zee heb'm met naoberhulp vanzelf weer op'ebouwd.
Kwoajongens werden deur 'm met de kop in 't varkenskot edouwd.
Zie kreeg'n soms hulp van "minister" Tone van de Ganzeboom.
Die zörg'n dat ze billijk an goe'kope machiens kond'n koom'n.
De stad rukt'n op, kwam steeds dichterbie, wat onze hond ok blaff'n.
Op 't laats kond'n ze uut die flats echt zeen wat bie ons de pot had te schaff'n
Gerrit trouwd'n met Hennie Kloosterboer, die 'm van de boerderieje kend'n.
Maar veertien daag'n later kwam nao 560 jaor an ten Voorde een ende.*

Jannie Loots - Wolt

*Haar vader kwam uut Groningen, socialist in hart en nieren
Die de partij in zien nieuwe dorp al heel gauw zol bestieren
Hee kwam in de gemeenteraad, was ambtenaar, commies
En Jannie Wolt ging bie de AJC, daarmee was zie erg wies.
Naor de Paosheuvel in Vierhouten, en 't hijsen van de vlag
't zingen van het "morgenrood", op naor de jongste dag
De eerste mei in Diepenveen, al vrog 't bedde uut
Bie Wolt en Loots hing vast pandoer, de rooie vlagge uut
Heur Appie kwam uut Dèventer, een graag geziene gast
A'j al lange woont in Diepenveen dan weet iej det nog vast*

Jan van den Berg

*'t Rietjen huuzen bie de Iessel genaamd de Halve Konte
had één kamer veur wonen, sloopen, kōken en wassen, zowel wit as bonte,
één bedstéé veur de olders, de ander veur de vier kinder.
Soms midden in 't hoge water; van moezen en ratten völle hinder.
De pompe was van hun én de buurvrouw, die al maa'deur bleef roep'n
"Merietjen maakt smerige voetstappen bie't pompen op mien stoepe".
Jan hef toen de zwengel noar de andere kante verplaatst
en maakt'n die buurvrouw an't schrikken."Iej pompt hier veur 't laatst".
Bie tapijtfabriek Peters werkten van den Berg töt zien verdeend pensioen.
Deur een lot in de loterieje kwam e doarnoa in goeien doen.*

Dick en Bertus Zwieters

*De sport in 't dorpje Diepenveen hef duudelijke sporen
Veur noe al meer dan 70 jaor werd D.S.C. geboren
Familie Zwieters druk in de weer met sporten en besturen
Nem vader en nem moeder Zwieters; zie maakten aoveruren
Pa was een tiedlang veurzitter en moeder zetten thee
De kètel an de fietse en iederene hielp mee
D'r waren heel wat kinderen te völle um op te neumen
Ja van zo'n stel mag iedere club in disse tied nog dreumen
Een aantal is d'r al niet meer, helaas zo kan 't verkeren*

Maar met een hoofdstuk in dit boek wilt wie ze allemaal eren

Willy Duivenvoorde en Jenny van Ginkel - ten Dam

*Op baron Stratenus jachtpartij schoot Prins Hendrik deur de veurdeur hen,
Van Duivenvoorde en iedereen kwam kieken, an zo'n gat mo'j toch effen
wenn'n.*

*In 't huus van de malle freule waren de meiden an 't gill'n en doll'n
En op de vierer bie Nieuw Rande schaatsten ze as ze wollen.*

Bie 't fretteren werd het knienehol bie de uutgang'n dichte stopt.

De fret werd er dan in'ezet maar Willy hef de jagers efopt.

Baron Stratenus had smetvrees, ie kwam'n 'm niet te noa

"En nog bin ik bange veur't kolkmonster, as ik naor 't dorp toe goa".

*Later maak'n Jenny van Ginkel onder andere hengels te gelde
en woont Willy Duivenvoorde nog steeds in Hengevelde.*

Gerrit Schuck

Waar eer de zaak van Hoetink was, werd Gerrit Schuck geboren,

Zien vader was daor annemmer die menig huus zol klaoren

Zien mooder dreef een winkeltje, zie deed in grutterszaken

Met ulevellen, veters drop, ja det wol echt wel smaken

En Gerrit die werd metselaar, hee maakten lange dagen

Maar Geertje kwam toen op zien pad, dus had-e niks te klagen.

Asse vrie was ging-e voetballen, hee was wel klein maar lenig

Ok snel, een absolute crack en baovenal linksbenig

En later werd 't de muziek op de bugel mosse 't leren

Ok jaorenlang de Dössers blaasmuziek in boerenkleren.

Jan Nieuwenhuis

Met zien breur sliep Jan op de hilde

woa'j allene wat zagen as mo' de gaslampe op tilde

Op de Mölle'belt mos ie met 't varken langs de tol.

't beest wist zelf de weg wel, as Jan noar de beer toe wol.

Schieven appels dreug'n ze op 't tichelwerk in de oaven

en Belgische peerden trok'n de karre de diek op steil noar boaven.

Jan Nieuwenhuus had 'n revolver tegen allerhande boev'n.

Hee hef gelukkig nooit op mensen scheeten hoeven.

Later trouwden hee met zien vriendinne Hennie Klein Nagelvoort

En ze lèèfd'n met hun koters nog lange op De Noord.

Wietwim Hopperus Buma

*Wietwim Hopperus Buma woonde eerst in 't Clooster det noe helaas
verdwenen is*

En toen een paar jaor Randerode, ok det is al geschiedenis

Tenslotte naor "Réfugium" een prachtig huus en een name met historie

Daor maakten hee ok de oorlog mee met daornao de victorie

Toen Wietwim amper op de dorpschool was'

Kwamp-e te zitten naost Wim Roetert vriend vanaf de tweede klas

Vaak spölden hee bie de boerderieje en sprak toen ok al heel gauw plat

*Daor heffe danok jaoren later heel wat veurdeel van e-had
Want hee werd burgemeester op 't platteland, daor mosse zich flink weren
Want zie wullen net as Diepenveen ok Warnsveld annexeren*

Willy Bonhof

*Bie Charlottenburg schaatsten zie des winters op de kolk
Bie het lich van de gaslamp'n 's aovends, dan was d'r völle volk.
Zie spanden een touw um te ploagen en de Hardonkchauffeur schrok zich rot.
Hee maakt'n een noodstop, maar Willy en zien moatjes waren al vot.
"Meester, mag ik afkiek'n?" Meester Jeurlink, die hef schik.
"Kun je dat niet zelf dan?" zegge. Bram zeg:"Dát neet, ma' melk'n, da kan ik".
Willy werd een vakman veur een stuuver in 't uur.
Keukens, deuren, doodskisten- hee maak'n ze niet duur.
Hee zakt'n in de kärke deur de vloer, zo in een graf.
Toen Willy zien vrouw töt de Pessink brach, liep lekker zien ketting der af.*

Floor Weverling

*Floor Weverling woont hier al lang niet meer, hef hier maar kort e-woond
Een terugblik op zien lèven, ik denke det det loont
Zien vader kwam uut Indië, wist alles van tabak
Diepenveensche Tabakcentrale gaf det in de oorlogstied dan ok gemak
In de oorlog was tabak uut Diepenveen in 't hele land bekend
Zie verbouwden, dreugden, fermeteerden 't, pas dan werd 't uut- event
Nao de oorlog lonkte Indië weer dus ging-e daor naor toe
Op de plantage lag zien hart, zien tempo was doeloe.
Ook zönne Floor vertrok uut Diepenveen en ging veur arts studeren
Zien vader stierf een maond veurdette veurgoed terug zol keren.*

Gerhard Dikkers

*"Wie war'n een van de eersten met radio en tillefoon
en ok met de auto noar Zwitserland was toen nog niet gewoon.
In de oorlog mog'ie neet slach'n dat was illegaal.
Noa de oorlog zag ie bloem'n. Slachtafval as mest, ideaal.
De Duutsers jatt'n mien fietse, as spion leerd'n ik ze toen een les.
Ma'op weg noar de Canadezen, pakt'n hem pardoes de SS.
Sofort Kleider ausziehen schreeuw'n ze en Befehl ist Befehl ist Befehl.....??
Ook Schießen en schießen, ma'gelukkig lieten ze ons toch maar heel."
Wat Dikkers nog meer belèf'n steet ok in dit nieuwe boek,
Ie mot 't beslist goan lèz'n oaver Jachtrust en andere koek.*

Hendrik van Essen

*Grootva van Essen kwam uut Welsum en streek neer op de Eikelhof
Een boerderieje op 't landgoed "Overvelde" det was bepaold gin sof
Van Coeverden de landgoedbaas hanteerden streng de regels
En hield de pachter zich daor niet an dan kostten hem det pegels
Zien veurname was Eduard hee was vriegezel en zuunig as de neeten
Det vertelden Jenneke de huusholdster die daor heel wat jaoren hef esleten
Eduard was ok vegetarier, het wild had daor vrie spel.
Hoewel, Prins Hendrik jaagden bie de buurman nou ja dan weet iej 't wel.*

*De vierde Hendrik woont ok noe nog steeds op Overvelde
Lèès verder aover hem en Geertje, um det ik alles det daar steet nog niet
vertelde.*

José Gregory

*Heur vader zörg'n veur hulp bie babies en sticht'n 't Greune Kruus.
Zelf bracht ze Merie Meue Van Leus'n 'n visjen bie heur in 't huus.
Bram 1,2 en 3 van de Kolkbos, maak'n tonnetjes en gierputten löög,
"Goh meneer Kolkman, wat stinkt dat". "Ja, mevrouw - ieder zien eigen meug".
De stoomtrein van de OLD0, liep vlak bie hun langs 't huus.
't Zwatte weggetjen was hard en zwart deur Ankersmits sintels en gruus.
Hun tuinman had greune vingers, deurumme was het heur vrind,
Umdat ze bloom'n en plant'n zelf ok zo prachtig vindt.
Ze vertelt van baden in teilen en dat ze bie de Canadees wol wèz'n.
En verder mojt verhaal van José Gregory jandorie zelf ma'lèz'n.*

Bé Koetsier

*Boerderiejen hebt soms fraaie namen: Toefmars, Kieftte en de Vlier
Allemaol spölt ze een rolle bie de familie Bée Koetsier
Maar 't wordt Klein Overvelde, bie 't Hanendorp in de buurt
En vandaor wordt-e op klompen, naor de dorpsschole e-stuurd
Het laatste stukjen van de oorlog werd daar spannend, lèès 't zelf
Bie Koetsier lagen de Duitsers, al met al een stuk of elf
De twaalfden was een officier maar die vertrok alleen
De anderen gaven zich toen aover, bevrijd was Diepenveen
En dan leert Bé zien Dinie kennen, getrouwd van toen af aan
Nao een flinke boerenbrulfte bie café "de Roode Haan"*

Linus Krijt

*Engelinus veul'n zich anétrokk'n töt werktuug'n en techniek'n
As de brandweer veur de iesbane water pomp'n, kwam hee netuurlijk kiek'n.
Een marskramer - in zien verhaal - stak huuz'n in de brand.
As de boerin heur geldkist redt, biedt dent de helpende hand.
Zien vaders sliepsteen dreien hard of soms ok wel te zacht.
Deurum hef hee toen ok subiet een motor an'ebbracht.
Zien doem kwam tussen tandwielen en hing der zo wat bie.
"Neet afknipp'n, hecht die doem, hee hef 'm neudig potverdrie".
De olde Grievink had geliek. Linus maak'n later nog een sniejer van tabak.
Wat hee wieter nog maken en dee, lèès ie aj dit beuksken pakt.*

Albert-Jan en Chris Oosterkamp

*Wie komt noe bie de Wilgerije det noe van landgoed "Overvelde" is
Olderlijk huus van de Oosterkamps, van Albert Jan en Chris
't heurden eertieds bie "de Hoek" hun va had 't epacht,
maar eigenaar Vertholen die verkocht 't onverwacht
't landgoed werd toen an-ekocht deur firma Ankersmit
Völ werkelozen ginge daar toen an de slag, d'r werd wat af-espit
In de oorlog was d'r ok een knecht, was eigenlijk student*

*Hee heetten Jan van Gennip Lührs, beslist geen bange vent
Want hee zat eigenlijk in 't verzet, soms was hun actie raak
Hee sneuvelden in Dèeventer, vlak bie de Twentol zaak*

Bets Ooiman - Egberts

*Opscheet'n en neet zeur'n was mien motto ! Dat zegt Bets.
Ok mien vader hield van anpak'n en neet van dom geklets.
Deurumme trouwd'n ik Wim Ooiman, hee was onze bakker.
Hee red'n mien uut de Möllekolk, anpak'n kon dee rakker.
Ooiman an 't karkplein was een café met stip en
menig jenever en roddelproat ging der vlot oaver de lippe.
In de oorlog zat Jan op taofel, te druk'n op de pot.
't Plafond kwam noa' bened'n. Wie schrokk'n ons toen rot.
Hemeltjen kwam op eerde. 't Vangzeil deed 't prachtig, man.
Bets Ooiman is bienoa tachtig, maa'weet er nog alles van.*

Gerritje Nieuwenhuis - Lueks

*De boerderie 't Weterman is ok al old van jaoren
En Gerritje heetten eerst nog Lueks toen zie daor werd geboren
Zie trouwt met Harmen Nieuwenhuis, die zaait en ploegt en dorst
Hef een vriendinne op Huize Weterman, heur name: is Klazien Borst
Haar man was gek op peerden organiseerde zelf concours hippique
Naost springen was d'r ok dressuur en een hele bult publiek
En zingen deed ze ook heel graag, zie begon bie "Looft den Heer"
Dat weer met het Kerkkoor samenging, weg was "olde zeer"
De vriendschap met Klazien is al die jaoren nog e-bleven
Die hef vlak veur haar dood een heel biezondere foto af-egeven*

Berend de Winter en Dika de Winter - Stegeman

*Berends opa was slachter an huus, iets wat noe zo aj weet neet meer mag.
Met scherpe messen in t foedraal ginge op pad op maandag en donderdag.
Berends vader was 'n boer en handel'n in landbouwgrond.
Hee had zeuven kinderen, acht kooien, wat pinken, twee motten, kippen en een hond.
Berend zelf werd zaak uutvoerder van de Kleine Landbouw, een bestelvereniging.
Hee leer'n zien Dika kenn'n, toene nao de karmse in Battum ging.
Dika wark'n veur dag en nacht bie de dokter. Schreef alles op een lei.
Zie hadd'n veertien kipp'n en op hun trouwdag lei iedere kip een ei.
In 1979 geet Beernd dan met pensioen. 't Was volgens hem mooi ewest.
En wat ze vedder nog belèèfd'n, ve'nem ie ai dit beuksken lèest.*

Dina Endendijk - Maatman en Dika Huiskamp - Maatman

*Tot slot de zusters Maatman, Dina en Dika zogezegd
Geboren op de Platvoet, daor was hun jeugd niet slecht
Spöltuin en kermse in de buurte en vlak naost 't huus een voetbalveld
Dèeventer wol de Pekelharingbos wel kopen, maar bood te weinig geld
En Dika bleef d'r wonen en Gerrit kwam d'r bie
En Dina ging 't huus uut vlak nao heur trouwerie
De oorlog gaf völ narigheid, een vliegtuug vlaog in brand
Drie vliegers kwammen daorbie umme, bie Maatman in 't land*

*Het huus van Zuethof brandden of, maar bie al det geweld
Bleef de piloot in lèven, det heb ze onlangs nog verteld.*